

天一閣藏明代方志選刊

天一閣藏明代方志選刊

廣平府志

廣平府志序

廣平守翁子相持其郡志一帙謁予于恒山之堂曰茲志乃前給諫陳君棐謫丞長垣時奉臺檄脩成將以考九邑之俗立畫一之政俾民有所依吏有所據則守之職也顧志成而俗不易心切而政不行則將焉用之曰子知夫水乎淵沉環滙源泉混混導之就下則放手四

海搏躍擊行則呼號震蕩恒不自適性
使然也是以君子爲政導其俗也易變
其俗也難要在順其勢而已昔魯人獵
較孔子亦獵較說者曰孔子小同於俗
固也聖人以天下無不可爲之事無不
可化之人隨事以寓理因人以成化在
吾導之何如耳今其獵坐作擊刺可以
教武分析禽獸可以教讓祭祀宴享可

以教孝夫獵魯人所知也曰武曰讓曰
孝魯人所不知也因其所已知通其所
不知在夫子無異行在魯人無難事此
爲政之準也今邯鄲永年其地廣其俗
勇可導之以義曲周肥鄉成安其地饒
其俗侈可導之以禮廣平威縣其地狹
其俗靡可導之以毅清河鷄澤其地瘠
其俗嗇可導之以勤因其習見之常通

其本心之蔽積之既久入之自深使民
見其義不見其勇見其禮不見其侈見
其毅不見其靡見其勤不見其嗇觀感
激勸九邑同風是謂之大同大同者不
同之所積故曰立之斯立道之斯行民
日遷善而不知誰之爲之者若徒拘其
志以囿民則將按圖而索驥又欲變其
俗以立異吾恐駭然而震矣是故志者

記也記其事以俟稽神而明之志不與
焉守曰由是觀之道不滯器化不依形
反而求之吾民沛乎有餘裕矣

嘉靖庚戌夏六月中泚

欽差巡撫保定等府地方兼提督紫荆等關
都察院右僉都御史少峯商大節書

廣平府誌序

予奉

帝命按畿輔真順廣大四郡顧予職在周為
掌贊書受法令屬維史任今之誌古之
史也予因重焉每所經歷必先問誌今
歲夏四月余巡至廣平翁郡守相以梓
完郡志來觀實維陳棐氏往以給舍謫
丞長垣時撰次有經緯二集有一圖三

表十二紀經緯者兩儀之象也一圖者
太極之體也三表者效三才也十二紀
者法十二時也對待有相配之體禪繼
有相生之序史氏曰斯可以誌矣夫誌
者言乎其志也心之所至而仁天下之
書也先正有曰必有關雎麟趾之意然
後可以行周官之法度今觀誌之所載
自封域以迄風俗井井繩繩皆法度也

而必有至誠惻怛之意油然而相愛藹然相接者行乎其間是故志之所至氣亦至焉氣之所至精亦至焉精之所至神亦至焉神之所至仁亦至焉仁者精神之運而志氣之充也是故於誌之前編而觀之覩疆域而志於保障之固覩郡縣而志於撫綏之周覩山川而志於奠安之永覩公宇而志於政惠之施覩學

校而志於樂育之澤觀版籍而志於生
養之庶觀壇宇而志於鬼神之洽觀古
蹟而志於保治之恒再於誌之後編而
觀之觀官秩而志於牧理之道觀選舉
而志於彙征之吉觀宦業而志於遺愛
之存觀賢行而志於厚德之光觀列淑
而志於敦睦之基觀

恩澤而志於施報之渥觀紀歷而志於豫泰

之久觀風俗而志於丕熙之懿凡此一
皆仁愛之流行也天有太極兩儀三才
十二時而不外乎一元之運誌有二集
一圖三表十二紀而不外乎一仁之通
元者天之用而志者仁之推矣予按蒞
茲土雖貞肅者在法度而惠綏元元之
意每與並行使觀一郡之誌者志仁乎
一郡則觀一省之誌者當志仁乎一方

觀天下之誌者當志仁乎天下軻氏曰
存心於天下加志於窮民予故曰誌者
仁天下之書也翁守旣知重誌其知志
於仁廣平矣夫

嘉靖己酉孟夏巡按直隸監察御史江
右項廷吉序

廣平府志目錄

卷之一 經一

封域志 圖

卷之二 經二

郡縣志 表

卷之三 經三

山川志 紀

卷之四 經四

建置志 紀

卷之五 經五

學校志

紀

卷之六

經六

版籍志

紀

卷之七

經七

壇宇志

紀

卷之八

經八

古蹟志

紀

卷之九

經九

官秩志

表

卷之十

經十

選舉志表

卷之十一 緯三

宦業志 紀

卷之十二 緯四

賢行志 紀

卷之十三 緯五

列淑志 紀

卷之十四 緯六

恩澤志 紀

卷之十五 緯七